



Relatóriu Observasaun ba Eleisaun Parlamentar 2017

Mahein Nia Lian Nú. 124, 31 Jullu 2017



Foto: Fundasaun Mahein, Jullu 2017

Fundasaun Mahein (FM)
Website: www.fundasaunmahein.org
2017



Kontiudu sira

Kontiudu sira	2
Introdusaun	3
Metodolojia	3
Istoria eleisaun hafoin restaurasaun independensia	4
Ambiente seguransa durante periodu eleisaun nian	4
Kampaña eleitoral	5
Loron eleisaun nian	7
Rezultadu eleisaun	9
Rekomendasaun	11
Bibliografia	12



Introdusaun

Fundasaun Mahein (FM) hanesan organizasaun sosiedade sivil ne'ebé hala'o monitorizasaun, peskiza no advokasia ba setor seguransa iha Timor-Leste desde tinan 2009. Iha tinan 2017 FM monitoriza eventua boot rua maka eleisaun ba Prezidente Repúblika no Eleisaun Parlamentar ne'ebé liu dadauk ne'e. Observasdor sira husi FM nian komprimenta lolos ba regulamentu sira eleisaun nian hodi tau observador sira nia pozisaun hanesan independente ka neutru ka la suporta ba partidu polítiku ruma. Nune'e observasdor sira FM nian ne'ebé akreditadu husi Sekretariadu Tekniku Administrasaun Eleitoral (STAE) hamutuk ema na'in sanolu resin-lima.

Iha kontestu Eleisaun Parlamentar 2017 ne'ebé kampaña eleitoral la'o durante fulan ida husi 20 Juñu to'o 19 Jullu 2017 hale'u Timor-Leste tomak ho tipu oin-oin husi partidu polítiku sira hodi hato'o sira nia programa ba populasau tomak. Loron 22 Jullu 2017 nu'udar momentu importante ida povu tomak fo nia konfiansa ba partidu sira ne'ebé sira konfia katak bele hadi'a sira nia moris liu husi prosesu demokratiku ida ne'ebé liu dadauk ne'e. Susesu boot ida hahu tiha ona iha Eleisaun Prezidente Repúblika nian iha 20 Marsu 2017 no ida ne'e repete-an tan dala ida iha Eleisaun Parlamentar 22 Jullu 2017 la'o ho hakmatek.

Nune'e, relatóriu ida ne'e FM relata rezultadu observasaun durante kampaña ka propaganda eleitoral, loron votasaun, kontajen votu no apuramentu final rezultadu eleisaun nian. FM fiar katak rezultadu observasaun no rekomendasaun sira ne'e bele fo kontribuisaun diak ba eleisaun sira iha futuru.

Metodolojia

Atu komprende lolos prosesu tomak ba eleisaun nian FM halo revizaun inisial ida ba kadru legal nasional sira eleisaun nian. Prosesu ketak ida FM halo mos observasaun direta durante no depois kampaña no votasaun to'o iha apuramentu nasional ba rezultadu eleisaun nian iha munisípiu ualu maka Baucau, Bobonaro, Covalima, Dili, Ermera, Liquiça, Manatuto no Viqueque. Hafoin prosesu sira iha leten ne'e ramata hodi konklui relatóriu liu husi metodu ne'ebé FM adopta maka *Security Sector Discussion* (SSD) hodi halo diskusaun no analiza ba rezultadu observasaun no rekomendasaun sira.

FM rekuñese katak relatóriu ida ne'e la ho observasaun no analiza ida komprensivu ba prosesu tomak eleisaun nian tamba ho limitasaun ne'ebé iha. Maibé buka haree husi lidun sira seguransa nian no identifka iregularidade, insidenti, asidenti no faktus sira seluk durante periodu eleisaun nian.



Istoria eleisaun hafoin restaurasaun independensia

La'os buat foun ida kona-bá problema polítika no seguransa iha Timor-Leste nia historia eleisaun. Eleisaun dahuluk tinan 2001 hafoin Konsulta Popular 1999, Timor-oan sira halo eleisaun ba Assembleia Konstituante ne'ebé ikus mai transforma ba Parlamentu Nasional nomos tinan tuir mai 2002 eleisaun ba Prezidente Repúblika. Situasaun polítika no seguransa sai manas liu iha historia eleisaun Timor-Leste nian iha tinan 2007 hafoin krize polítika 2006¹ no eleisaun 2012² ne'ebé misaun Nasoens Unidas besik atu ramata.

Timor-Leste iha esperiensa lubuk ida ona iha eleisaun sira liu ba ho violênsia. Maske violênsia sira ne'e balu la iha ligasaun direta ho eleisaun maibé prova ida katak situasaun antes eleisaun demonstra uluk ho violênsia no depois rezultadu eleisaun nian. Iha eleisaun jeral 2007 dahuluk liu ho krize polítika 2006 nia marka historia violênsia ida ne'ebé halo Timor-oan sira halai fahe-malu no kontinua kedas ho violênsia sira liga ho Grupu Arte Marsiais (GAM).³ Iróniku aumenta maka'as liu-tan iha durante kampaña eleitoral ba eleisaun Prezidente Repúblika no Parlamentar. Situasaun ne'ebé grave liu depois rezultadu eleisaun Parlamentar nian hanesan akontese iha Viqueque, Baucau, Dili no Ermera inklui munisipiu balu.

Nune'e mos iha eleisaun 2012 durante kampaña eleitoral no depois eleisaun ka rezultadu eleisaun nomos formasaun Governu sosa ho ema nia mate. Akontesementu grave liu iha kapital nasaun nian no rejista insidenti grave ida husi atuasaun polisia nian tiru mate mane estudante ida iha Hera-Dili.⁴

Hafoin Nasoens Unidas nia mandatu ramata iha Timor-Leste tinan 2012, eleisaun dahuluk ne'ebé organiza husi Governu Timor-Leste rasik maka Eleisaun ba Lideransa Suku 2016 la'o ho susesu. Liu deit fulan balu Eleisaun ba Prezidente Repúblika hala'o iha lora 20 Marsu 2017. Iha Eleisaun ba Prezidente Repúblika ba periodu 2017-2022 mosu presepsaun oin-oin kona-bá asuntu seguransa nian hanesan teste boot ida ba instituisaun seguransa Timor-Leste. Hodi kompara buat seluk husi akontesementu sira iha tinan sanolu liu ba iha Eleisaun 2012 no 2007. Rezultadu eleisaun Prezidensial 2017 hatudu momos ona rezultadu eleisaun ida ne'ebé la'o ho paz no hatudu tan dala-ida iha eleisaun Parlamentar 22 Jullu 2017.

Ambiente seguransa durante periodu eleisaun nian

Durante kampaña eleitoral to'o iha lora eleisaun nain seguransa iha teritoriu tomak ho ambinete ida hakmatek no sidadaun sira hotu antusiasmu partisipa iha eventu demokratiku ida ne'e. Buat sira ne'e hotu konta ho servisu maka'as husi orgaun sira

¹ Relatóriu Avaliasaun kona-ba Violénsia Armada iha Timor-Leste (TLAVA). Violénsia Eleitoral iha Timor-Leste:identifikasaun no avaliasaun ba insidente no resposta sira. No. 3, Juñu 2009.

² Eleisaun 2012 rejista insidenti fatal ida iha Hera-Dili ne'ebé hamate mane joven estudante ida hafoin eleisaun. Maske nune'e em-jeral insidenti menus liu kompara ho Eleisaun 2007.

³ Relatóriu Avaliasaun kona-ba Violénsia Armada iha Timor-Leste (TLAVA). Grupu sira, gang sira no violénsia armada iha Timor-Leste. No. 2, Abril 2009.

⁴ Relatóriu Fundasaun Mahein, Jullu 2012.



eleitoral nian Comissão Nacional de Eleições (CNE) no STAE hodi organiza eventun ne'e. Ho apoiu seguransa husi Polícia Nacional Timor-Leste (PNTL) no FALINTIL-Força de Defesa de Timor-Leste (F-FDTL) nian. Inklui papel importante ida husi media nasional no internasional sira nian hodi divulga informasaun ba públiku. Nune'e mos ho monitorizasaun independente ida husi observador nasional no internasional sira nian kona-bá prosesu eleisaun ne'e tomak.

Pontu prinsipal ida durante monitorizasaun FM nian nota katak esforsu no servisu maka'as husi lider partidu polítiku sira nian hodi tau aas interese sira Estadu nian no kompremete garante paz no estabilidade durante kampaña eleitoral to'o rezultadu eleisaun nian liu husi Paktu Unidade Nasional ne'ebé komvoka husi Presidente Repúblika, Ministériu Interior ho Rede Prevençãun Konfliktu, no eventun oin-oin husi Timor-oan sira hodi promove paz no estabilidade. Hanesan momentu istoriku ida ne'ebé prova lolos kapasidade no maturidade Timor-oan sira nian hodi hakat liu obstaklu ida ne'e.

Sidadaun hotu-hotu livre, la iha ameasa no violensia ruma hasoru vontade populasaun nian hodi asesu ba kampaña ho tipu oin-oin ne'ebé realiza husi partidu polítiku sira iha teritoriu tomak nune'e mos impedementu ka ameasa ruma hasoru populasaun bainhira ba fó sira nia votu. Enkuantu mosu deit iregularidade balu husi partidu polítiku sira, militante sira no insidenti balu ne'ebé ladun grave no asidenti ida hamate militante ida bainhira kampaña hela lora ida atu ramata. Nune'e mos uma balu hetan estragus iha Munisípiu Viqueque bainhira mosu konfrontu kiik ida entre militante partidu KHUNTO nian ho ema balu iha dalan bainhira fila husi kampaña.

Kampaña eleitoral

1. Polémika sosa votu

Durante kampaña eleitoral iha munisípiu sira ne'ebé FM halo observaun rona husi comunidade sira kona-bá fahe osan, kalen no fahe fos husi partidu polítiku balu. FM mos nota durante lora rua hafoin kampaña eleitoral "lora hakmatek" partidu polítiku balu mobiliza nia militante sira ba vota iha suku tuir unidade jeografika ne'ebé militante sira resensea ba.

Política osan ka fahe osan husi partidu polítiku balu sita mos husi Presidente PLP Taur Matan Ruak ne'ebé simu keixa husi comunidade katak partidu CNRT no FRETILIN fahe osan durante kampaña eleitoral no sai *headline news* husi media nasional sira nia públikasaun.

Notísia ne'ebé sita iha públikasaun media Timor Post lora 1 Julu 2017 kona-bá Presidente PLP Taur Matan Ruak hatu'o iha kampaña PLP nian iha Postu Administrativu Letefoho Munisípiu Ermera iha lora 29 Juñu 2017. Sita mos iha notísia ne'e katak kada suku ida fahe US\$ 3,000 hodi fahe militante, simpatizante no populasaun sira ne'ebé diside la tama iha partidu no ema ida simu US\$ 25 ba tuir kampaña. Maske nune'e lideransa husi partidu CNRT nian rejenta katak CNRT la fahe osan ba militante sira no husu atu hatudu prova kona-bá fahe osan nian.



Nune'e mos lideransa husi partidu FRETILIN nian rejeita mos kona-bá fahe osan durante kampaña eleitoral.

Durante observasaun FM nian populasau sira ne'ebé partisipa iha kampaña hato'o mos katak antes sira ba kampaña enxe mina gratuita husi partidu polítiku balu no molok enxe mina tenke tau naran no simu kamizola partidu nian. FM nota iha Munisípiu Viqueque Postu Administrativu Uatolari Suku Vessoru, bainhira kampaña partidu CNRT nian hala'o iha Suku Uani-Uma Postu Administrativu Uatocarbau iha lora 6 Jullu 2017. Populasau balu hato'o ba FM katak "tamba enxe mina gratuita entau ami mos hakarak ba tuir kampaña CNRT nian maibé ami nia partidu la'os CNRT no ami nia votu segredu". FM konfirma katak responsavel partidu CNRT nian ne'ebé fó mina no enxe gratuita lidera husi grupu *Mai Apoiu Xanana (MAX)*.m Populasau sira mos hato'o ba FM kona-bá fahe osan ba ema sira ne'ebé ba tuir kampaña partidu CNRT nian husi grupu MAX maibé populasau sira mos lahatudu prova lolós kona-bá fahe osan husi grupu ne'e nian.

2. Violasau ba orariu kampaña nian

Iha priodu kampaña ka propaganda eleitoral nian FM mos nota katak partidu polítiku balu viola regra normal ba kampaña nian ne'ebé lolos tuir orariu ne'ebé aprova ona husi CNE. Kazu ne'ebé nota iha lora 6 Jullu 2017 kampaña PLP no KHUNTO iha Bobonaro; tuir orariu partidu KHUNTO halo kampaña iha Maliana hahu husi dader to'o meudia, maibé depois ekipa FM to'o iha fatin konfirma katak kampaña muda fali ba lorokraik no ekipa FM la konsege observa durante kampaña KHUNTO nian. Tuir dalan ekipa FM nota katak militante no apoiante partidu KHUNTO uza atributu arte marsiais nian no uza mos simbolu seluk hanesan "46". Kazu sira nune'e FM identifika mos iha munisípiu seluk no kapitál nasaun nian maibé susar identifika simbolu ne'e nia sintidu lolós liga ho atividade kampaña nian. Nune'e mos susar oituan atu identifika ligasaun arte marsiais ho partidu polítiku iha eventu sira nune'e.

Iha munisípiu Bobonaro kampaña PLP nian, tuir kalendariu hala'o iha Balibo lora 6 Jullu 2017 parte lorokraik maibé muda derepente ho razaun tamba atividade Kruz Joven nian iha Balibo. Ho ida ne'e kampaña husi PLP muda fali ba lora 7 Jullu no hala'o iha Maliana Vila.

Nafatin iha violasaun sira ba orariu kampaña nian, iha Munisípiu Liquiça kampaña partidu FRETILIN ho tipu dialogu iha Tibar liu oras ne'ebé determina ona iha Dekretu Governu N.º 18/2017, 12 Maiu kona-bá Regulamentu Kampaña Eleitoral nian artigu 11 ne'ebé permite deit husi tuku 08:00 to'o 18:30 OTL maibé lideransa partidu nian ne'ebé halo diskursu dadauk aviza katak halo deit dialogu ne'ebé liu oras mos la iha buat ida.

3. Violasau ba kodigu estrada no asidente

Bainhira hahu kampaña ka iha semana dahuluk iha kapitál nasaun nian PNTL seriu tebe-tebes halo atuasaun iha estrada públiku bainhira komidade no militante sira ne'ebé partisipa iha kampaña viola kodigu estrada. Maibé atuasaun sira ne'e la'o deit



semana balu nia laran deit no violasaun kontinua aumenta husi militante partidu sira bainhira lori motor no kareta. Violasaun sira nune'e kuaze militante partidu hotu-hotu komete durante sira nia kampaña. Militante no simpatizante sira lori motor la uza kapasete no ho motor *kanu racing* halo barullu iha estrada públiku. Iha fatin seluk motor *kanu racing* sai hanesan animasaun iha fatin kampaña nian.

Nune'e mos komvoiu sira tuir dalan protokolu sira kapitál nasaun nian la fó espasu ba movimentu públiku nian. FM konfirma ho membru PNTL sira ne'ebé vijilansia iha estrada hato'o katak sira susar oituan atu hapara ho komvoiu ne'ebé involve ema barak no iha fatin kampaña sira labele halo intervensaun tama iha laran maske iha ne'eba militante balu utiliza motor *kanu racing* halo barullu hale'u fatin kampaña nian.

Konvoiu sira husi militante partidu nian ne'ebé susar oituan atua husi polisia sira no rezulta mos asidente balu ne'ebé hakanek no balu mate durante konvoiu ne'e. FM rejista katak iha Bobonaro militante ida husi PLP hetan asidente no kanek durante sira nia komvoiu kampaña nian. Nune'e mos militante ida seluk mate no seluk kanek todan no kman iha asidente ida iha Dili durante kampaña partidu CNRT nian iha loron 18 Jullu 2017.

Loron eleisaun nian

1. Votante sira lakohi vota iha suku foun

Iha loron votasaun nian, votante sira lakohi vota iha suku foun ne'ebé estabeselese ona iha Postu Administrativu Cristu Rei, maka iha suku Ailok. Iha situasaun ne'e votante seluk ameasa votante ne'ebé lakohi ho ameasa haruka polisia kaer votante ne'ebé lakohi vota. Razaun husi votante ne'ebé lakohi vota iha suku Ailok tamba suku foun no hakarak vota iha suku Becora. Iha situasaun ne'e mosu diskusaun naruk no impede prosesu votasaun to'o iha tuku 10:00 liu depois hala'o fali votasaun.

2. Fiskais partidu sira no lideransa komunitaria

Fiskais PD nian ameasa Brigada STAE no CNE nian tenke sura lolos durante kontajen votu nian iha Suku Bairo Pite - Dili. FM mos nota durante akontesementu la iha prezensa husi polisia sira. Fiskais sira la'o rungu-ranga, sai-tama durante kontajen de votu. FM mos identifika katak Fiskais PD nian lanu durante prosesu votasaun no kontajen de votu. Ho presaan sira nune'e implika to'o iha atividade kontejen votu nian husi ofisial STAE no CNE nian, nune'e kontajen votu hatudu katak votu barak liu ema sira ne'ebé ba vota iha Sentru Votasaun Suku Bairo Pite nian. Ikus mai kontajen votu repete ka sura fila fali to'o tuku 02:00 madrugada loron 23 Jullu 2017.

Iha Munisipiu Baucau Sentru Votasaun Suku Uailili nian Fiskais Partidu FRETILIN nian hamrik besik iha odamtan sentru votasaun nian bainhira votante sira forma atu tama iha sentru votasaun nian fó hatene ba votante sira katak vota ba sira nia partidu. FM identifika mos responsavel partidu FRETILIN nian iha Suku Uailili lori familia sira nia kartaun eleitoral ba sentru votasaun hodi vota. Hafoin ne'e sira



konfirma ho Brigada STAE nian no la autoriza hodi vota tamba ema ida labele vota liu dala ida ka lori ema seluk nian kartaun eleitoral hodi ba vota.

Iha Sentru Votasaun Suku Ritabou Postu Administrativu Maliana Munisipiu Bobonaro nian FM nota katak ema ho difesiente ida nia oan lori ba sentru votasaun atu ba vota, bainhira to'o iha sentru votasaun fiskais husi partidu FRETILIN nian interven no husu atu ajuda lori ba vota maibe nia oan lasimu ka la fo no lori direta ba kabina vota nian hodi vota.

Iha Suku Kampung Alor – Dili, durante loron eleisaun nian Xefe Suku Kampung Alor la'o tuir ka tama sai iha aldeia no bairu suku nian hodi fohatene ba comunidade sira ba vota. Observasaun FM nian nota katak xefe suku aleinde ba bolu comunidade sira ba vota maibe ne'e potencia bele influencia votante sira hodi ba vota partidu ruma.

3. Atributu partidu nian durante loron votasaun nian

Durante loron votasaun nian observasaun FM nian iha sentru votasaun Bedasi Suku Fatululic - Covalima, atributu ka stiker PD nian la hasai no iha loron votasaun nian no taka besik iha Sentro Votasaun Bedasi. Iha Sentru Votasaun Suku Uailili – Baucau nian militante FRETILIN ho kamizola partidu FRETILIN nian ba vota nune'e oficial sira STAE, CNE no PNTL haruka fila hafoin fila fali mai vota. Nune'e mos votante ida ho idade 70 resin maka tama ba kabina votasaun lori ho bandeira FRETILIN nian (surat-tahan kiik ida) depois ofisiais sira prende tiha.

4. Insidenti durante no depois loron eleisaun

Loron 22 Jullu 2017 oras 14:30 iha Fatu-Ahi - Dili, iha grupu ida ameasa membru F-FDTL ida iha Fatuahi Dili no grupu ne'e husu membru F-FDTL atu halo esparing. Hafoin ne'e Polisia Militar halo kedas intervensaun no kaptura ema ida husi grupu ne'ebé ameasa hasoru membru F-FDTL ne'e.

Iha loron 23 Jullu 2017 militante FRETILIN no PD iha Aldeia Avansa Suco Bairro Pite militante PD ameasa militante FRETILIN kona-ba ponte ne'ebé halo iha Aldeia Avansa tamba ponte halo husi partidu PD nian durante kampaña eleitoral "ponte ne'e PD nian ne'ebé imi militante FRETILIN sira labele la'o iha ponte ne'e nia leten tamba imi la vota ba PD". Nune'e mos militante FRETILIN nian ida ho motor sadik militante seluk husi PD no PLP nian ho lian maka'as "PD la halo". Ho ida ne'e mosu duni baku malu entre militante FRETILIN ne'e ho PD no PLP nian.

5. Votante ida pública ninia votu

Iha Suku Uailili, Joven feto ida hasai fotografia voletin votu ne'ebé nia vota ona depois pública iha nia Facebook. Kazu ne'e identifika husi oficial CNE ida iha Sentru Votasaun Suku Tirilolo – Bucau no FM konfirma katak ofisiais CNE ne'e hato'o ona ba CNE Baucau nian no orienta ona ba PNTL atu kaptura. Maibe depois ofisiais CNE ne'e to'o iha Suku Uailili la iha polisia ruma ne'ebé mosu iha ne'eba. Depois



konfirma fali ba ofisiais CNE ida iha Suku Uailili katak evidencia sira ne'e hato'o ona ba polisia maibe polisia hatete sei hein mandatu kapturasaun.

Rezultadu eleisaun

Partidu ruanolu resin-ida konta ho bloku koligasaun ida kompete iha Eleisaun Parlamentar 22 Jullu 2017, rezultadu eleisaun ne'ebé hatudu partidu lima deit hakat liu bareira 4% ka marka nia asentu iha Parlamentu Nasional maka partidu FRETILIN, CNRT, PLP, PD, no KHUNTO. Husi total kadeira 65 fahe ba partidu sira ne'ebé liu bareira FRETILIN – 23, CNRT – 22, PLP – 8, PD – 7 no KHUNTO – 5.⁵

Partidu/Koligasaun	Total Votus	Porsentu (%)
FRETILIN	168.480	29,7
CNRT	167.345	29,5
PLP	60.098	10,6
PD	55.608	9,8
KHUNTO	36.547	6,4
PUDD	15.887	2,8
UDT	11.255	2,0
FRENTI-MUDANÇA	8.849	1,6
PEP	6.775	1,2
APMT	5.461	1,0
BUP	4.999	0,9
PST	4.891	0,9
PSD	4.688	0,8
PR	3.951	0,7
PDN	3.846	0,7
CASDT	2.330	0,4
PDP	2.079	0,4
PDC	1.764	0,3
MLPM	1.332	0,2
UNDERTIM	1.216	0,2
PTD	669	0,1
Total	568.070	100

Fonte: Comissão Nacional de Eleições (CNE), 28 Jullu 2017

Rezultadu ida ne'e hatudu katak la iha partidu ida maka liu porsentu limanolu (50%). Signifika katak sei iha negosiasaun ka forma koligasaun entre partidu politiku sira ne'ebé iha asentu Parlamentu Nasional.

⁵ Comissão Nacional de Eleições (CNE), 28 Jullu 2017.



Prezidente Repúblika konvida ona partidu polítiku sira ne'ebé liu bareira 4% ba iha Palasiu Prezidencia nian hodi rona partidu sira nia hanoin. Partidu polítiku sira nia lideransa ko'alia ona ba públiku kona-bá formasaun governu ne'ebé sei mai maibe seidauk serteza forma governasaun ida oinsa maka sei akontese. Partidu FRETILIN hanesan partidu ne'ebé hetan votu barak liu ka maioria simples (29,7%) liu husi nia Sekretariu Jeral Dr. Mari Alkatiri hato'o katak FRETILIN sei buka forma governu inkluzau ida no konta mos ho partidu sira seluk nia apoiu. Maibé seidauk iha negosiasaun ida ne'ebé bele fó serteza partidu sira ne'ebé iha asentu atu halo koligasaun. Partidu Libertasaun Popular (PLP) liu husi nia Prezidente Taur Matan Ruak hafoin hasoru Prezidente Repúblika hato'o katak PLP sei sai opozisaun iha Parlamentu Nasional. Maibé PD ho KHUNTO hato'o katak pruntu atu halo koligasaun bainhira konvida sira. Maibé lideransa CNRT nian liu husi Sekretariu Jeral Francisco Kalbuady Lay hato'o katak avansa ho konferensia partidu nian hodi hola desizaun ruma kona-bá pozisaun CNRT nian. Nota katak durante kampaña eleitoral CNRT hato'o bainhira CNRT la hetan maioria absoluta sei sai opozisaun iha Parlamentu Nasional.

Lisaun boot ida husi eleisaun Parlamentar 2007, partidu FRETILIN manan eleisaun ho votu maioria simples maibé la konsege forma koligasaun no ikus mai CNRT forma koligasaun ho partidu PD, Koligasaun ASDT-PSD ho naran Aliansa Maioria Parlamentar (AMP). FRETILIN hanesan partidu ne'ebé manan eleisaun sai hanesan opozisaun ho lian kro'at la rekuñese governasaun AMP ka bolu Governu de faktu.

Situasaun ida ne'e repete-an iha eleisaun Parlamentar 2012, CNRT hanesan partidu ne'ebé manan eleisaun maibé maioria simples no avansa nafatin ho koligasaun CNRT, PD no Frente-Mudansa ho naran Bloku Governu Koligasaun (BGK). FRETILIN kontinua hanesan opozisaun iha Parlamentu Nasional. BGK bele konsidera katak monu iha dalan klaran iha inísiu tinan 2015 mosu remodelasaun no rejignasaun Xanana Gusmão nian husi nia kargu Primeiru-Ministru. Rejignasaun ida ne'e CNRT hanesan partidu ne'ebé manan eleisaun ho proposta foun seluk kargu Primeiru-Ministru indika figura seluk husi FRETILIN nian. Husi ne'e públiku nia espekulasaun katak CNRT halo koligasaun foun seluk ho FRETILIN. Maske lideransa FRETILIN rejeita espekulasaun sira ne'e katak FRETILIN la halo koligasaun ho CNRT maibé fó nia ema bainhira presiza hodi kaer ukun. Espekulasaun kontinua la'o ho espektativa oin-oin katak sei mosu koligasaun foun iha 2017 depois eleisaun ka koligasaun FRETILIN-CNRT.

Konjuntura sira nune'e possibilidade situasaun 2007 bele repete-an, FRETILIN hanesan partidu ne'ebé manan eleisaun bainhira la konsege forma koligasaun bele mosu koligasaun seluk entre CNRT, PLP, PD no KHUNTO. Maibé senariu seluk husi konjuntura política tinan hirak ikus ne'e nian FRETILIN potencia mos halo koligasaun ho CNRT no prova ba espekulasaun sira durante ne'e la'o kona-bá koligasaun FRETILIN-CNRT iha eleisaun Parlamentar 2017. Ida ne'e ita bele haree iha tinan 2015 CNRT hanesan partidu manan eleisaun maibé Primeiru-Ministru hatudu husi partidu opozisaun FRETILIN. Kontinua to'o iha eleisaun Prezidensial 2017 apoiu



CNRT ho lideransa Xanana Gusmão nian ba kandidatu Prezidente Repúblika husi partidu FRETILIN nian Francisco Guterres “Lú-Olo” no manan iha primeira volta eleisaun 20 Marsu 2017. Nune’e mos durante kampaña eleitoral eleisaun Parlamentar 2017 lideransa FRETILIN nian hato’o katak “FRETILIN manan Xanana manan” no “FRETILIN forma governu konta mos ho apoiu Xanana nian”. Maibé buat sira ne’e hotu depende ba negosiasaun entre lider partidu polítiku sira nian.

Rekomendasaun

1. Rekomenda ba lider partidu polítiku sira kontinua ho komunikasaun ida ne’ebé garante paz no estabilidade durante formasaun governu nian.
2. Rekomenda ba públiku tomak simu rezultadu eleisaun ne’ebé liu dadauk ne’e maske konkorda malu ka la konkorda malu durante kampaña eleitoral, no iha dinamika política foun ne’ebé sei akontese durante formasaun governu nian.
3. Rekomenda ba orgaun eleitoral sira hanesan CNE no STAE presiza tau atensaun ba frakeza sira ne’ebé identifika hodi mellora servisu orgaun eleitoral nian iha eleisaun sira futuru.
4. Rekomenda ba autoridade sira seguransa nian kontinua servisu ho independente hodi asegura formasaun governu ne’ebé besik dadauk ne’e. Ida ne’e ita boot sira hatudu ona durante kampaña eleitoral, lora votasaun, to’o iha apuramentu nasional rezultadu eleisaun nian.



Bibliografia

Decreto do Governo N.o 16 /2017 de 12 de Maio, Regulamento Sobre a Apresentação de Candidaturas para a Eleição dos Deputados ao Parlamento Nacional

Decreto do Governo N.o 17 /2017 de 12 de Maio, Regulamenta as actividades de fiscalização, observação e de cobertura mediática da eleição dos Deputados ao Parlamento Nacional

Decreto do Governo N.o 18 /2017 de 12 de Maio, Regulamento da Campanha Eleitoral

Lei N.º 9/2017 de 5 de Maio, Quarta Alteraçã Lei N.º 6/2006 de 28 de Dezembro, Lei Eleitoral para o Parlamentu Nacioal.

Relatóriu Fundasaun Mahein kona-bá Observasaun Eleisaun Prezidente Repúblika 2017. Mahein Nia Lian Nú. 121, Ioron 6 Abril 2017.

Relatóriu Fundsaun Mahein kona-bá Lalatak Konflitu iha Eleisaun Jeral 2017. Mahein Nia Lian Nú. 117, Ioron 21 Novembru 2016.

Relatóriu Avaliasaun kona-ba Violénsia Armada iha Timor-Leste (TLAVA). Violénsia Eleitoral iha Timor-Leste:identifikasaun no avaliasaun ba insidente no resposta sira. No. 3, Juñu 2009.

Relatóriu Avaliasaun kona-ba Violénsia Armada iha Timor-Leste (TLAVA). Grupu sira, gang sira no violênsia armada iha Timor-Leste. No. 2, Abril 2009.